

Na osnovu člana 22 Statuta Brčko distrikta Bosne i Hercegovine - prečišćeni tekst (Službeni glasnik Brčko distrikta Bosne i Hercegovine, broj 2/10), Skupština Brčko distrikta Bosne i Hercegovine, na 23. redovnoj sjednici održanoj 8. aprila 2010. godine, usvaja

**ZAKON
O IZMJENAMA I DOPUNAMA ZAKONA O PODSTICAJU
U POLJOPRIVREDNOJ PROIZVODNJI U BRČKO DISTRIKTU BiH**

Član 1

U Zakonu o podsticaju u poljoprivrednoj proizvodnji (Službeni glasnik Brčko distrikta Bosne i Hercegovine, brojevi: 11/06 i 19/07), u članu 1 iza riječi "u poljoprivrednoj proizvodnji" dodaju se riječi: "i ruralnom razvoju".

Član 2

Član 2 mijenja se i glasi:

„(1) Ruralni razvoj podrazumijeva skup politika, mjera i aktivnosti koje za cilj imaju sveobuhvatan ekonomski, socijalni i kulturni napredak stanovništva ruralnih područja i koje se planiraju i provode uz uvažavanje principa održivog razvoja i očuvanja i unapređenja kvaliteta okoliša.

(2) Podsticaj su novčana sredstva za razvoj poljoprivrede i ruralni razvoj u cijelom Brčko distriktu Bosne i Hercegovine (u daljnjem tekstu: Brčko distrikt BiH).“

Član 3

U članu 3, riječi: „Bosne i Hercegovine“ mijenjaju se skraćenicom: „BiH“.

Član 4

U članu 4, stavu 1 riječi: „Bosne i Hercegovine“ mijenjaju se skraćenicom: „BiH“.

Član 5

Iza člana 4 dodaje sa novi član 4a koji glasi

„Član 4a

(1) Odjeljenje za poljoprivredu, šumarstvo i vodoprivredu vrši upis pravnih lica, preduzetnika i individualnih poljoprivrednih proizvođača (u daljnjem tekstu: korisnici) na području Brčko distrikta BiH.

(2) Odjeljenje za poljoprivredu, šumarstvo i vodoprivredu uspostavlja i vodi Registar poljoprivrednih gazdinstava i Registar klijenata u Brčko distriktu BiH.

(3) Način i metoda upisa u registre iz stava 2 ovog člana utvrđuju se na osnovu odluke koju donosi gradonačelnik Brčko distrikta BiH na prijedlog Odjeljenja za poljoprivredu, šumarstvo i vodoprivredu.“

Član 6

Član 5 mijenja se i glasi:

„ (1) Pravo na podsticaj imaju korisnici pod uslovom da:

a) su upisani u Registar poljoprivrednih gazdinstava i Registar klijenata u Brčko distriktu BiH ili jednom od registara;

b) obavljaju djelatnost iz oblasti poljoprivrede ili provode mjere politike ruralnog razvoja u Brčko distriktu BiH koje obuhvataju mjere za: povećanje konkurentnosti, zaštitu ruralne okoline i leader pristup, diversifikaciju aktivnosti u ruralnim područjima i poboljšanje kvaliteta života u ruralnim područjima;

c) imaju prebivalište, sjedište ili posjeduju vlastito poljoprivredno zemljište na teritoriji Brčko distrikta BiH;

d) je veći dio proizvodnje namijenjen ili za prodaju na tržištu ili za uskladištenje ili će biti potrošen kao reprodukcijski materijal u vlastitoj proizvodnji ili za realizaciju projekata i mjera ruralnog razvoja;

e) su ispunili obaveze prema Brčko distriktu BiH po osnovu:

1) ugovora o zakupu poljoprivrednog zemljišta u svojini Brčko distrikta BiH,

2) ugovora o robnim kreditima za steone junice,

3) doprinosa za zdravstveno osiguranje zaposlenih za pravna lica i

4) poreznih obaveza za pravna lica.

(2) Korisnici ostvaruju pravo na podsticaj na osnovu zahtjeva podnesenog Odjeljenju za poljoprivredu, šumarstvo i vodoprivredu uz uslov da ispunjavaju propisane kriterije.

(3) Korisnici koji ostvare pravo na podsticaj dužni su dobivena sredstva namjenski koristiti.

(4) Odjeljenje za poljoprivredu, šumarstvo i vodoprivredu uspostavlja i uređuje bazu podataka korisnika podsticaja.“

Član 7

U članu 6 oznaka stav „(1)“ briše se, a u tački d) ovog člana interpunkcijski znak tačka "(.)" zamjenjuje se interpunkcijskim znakom tačka-zarez "(;)" i dodaje se nova tačka e) koja glasi "e) ruralni razvoj."

Član 8

U članu 7 oznaka stav „(1)“ briše se, a u tački g) interpunkcijski znak tačka "(.)" zamjenjuje se interpunkcijskim znakom tačka-zarez "(;)" i dodaje se nova tačka h) koja glasi "h) ruralni razvoj."

Član 9

U članu 9 oznaka stav „(1)“ briše se.

Član 10

U članu 11 oznaka stav „(1)“ briše se.

Član 11

Član 18 mijenja se i glasi:

”(1) Novčanom kaznom u iznosu od 5.000,00 KM do 15.000,00 KM kaznit će se za prekršaj pravno lice ako:

a) ostvari podsticaj suprotno članu 7 ovog zakona;

b) dostavi lažne podatke radi ostvarenja novčanih sredstava za podsticaj.

(2) Za prekršaj iz stava 1 ovog člana kaznit će se fizičko lice novčanom kaznom u iznosu od 500,00 KM do 1.500,00 KM, a odgovorno lice u pravnom licu novčanom kaznom u iznosu od 1.000,00 KM do 3.000,00 KM.

(3) Za prekršaj, uz novčanu kaznu izriče se i mjera oduzimanja podsticaja.

Član 12

Član 21 briše se, a član 22 postaje član 21.

Član 13

Ovaj zakon stupa na snagu osmog dana od dana objavljivanja u Službenom glasniku Brčko distrikta Bosne i Hercegovine.

Broj: 01-02 -207/10
Brčko, 8. aprila 2010. godine

PREDSJEDNIK
SKUPŠTINE BRČKO DISTRIKTA BiH

Mirsad Đapo, dipl. pravnik, s.r.

